

六祖壇經

〈興聖寺本〉對錄文

內觀教育基金會編集（2018.05）

【對錄文說明】

- （1）〈興聖寺本〉是日本興聖寺藏的《六祖壇經》，影本見：柳田聖山主編，《六祖壇經諸本集成》，京都：株式會社，中文出版社，1976。
- （2）對錄文的頁碼：依據上述〈興聖寺本〉影本 pp49-65。
- （3）對錄文的每行都依據原抄本排列。對錄文的每字也盡量接近原抄本。
- （4）**行書特別字、俗字**，用紅色標示，有時改成繁體。
- （5）明顯的**錯字、衍字、有疑問處**用藍色標示。

〈興聖寺本〉對錄文

49 上

六祖壇經序

依真小師邕州羅秀山惠進禪院沙門惠昕述
原夫真如仏性本在人心、**正**即諸境難**侵**心邪即
衆塵易染能止心念衆**惡**自亡**眾惡既亡**諸善
皆備**諸善**要備非假外求悟法之人自心如日遍
照世間一切**无礙**見性之人**雖處**人倫其心自在**无**
所惑**亂**矣**故我六祖大師廣為學徒說見性法門**
總令自悟成仏目曰**壇經流傳後學**古本文繁
披覽之徒初忻後**厭**余以太歲丁卯月在**蕤賓**
二十三日辛亥於思迎塔院**分為兩卷凡十一門貴接**

後來同見仏性者子健被旨入蜀回至荆南於
族叔公祖位見七**世**祖文元公所**觀寫**本六祖
壇經之後題云時年八十一**第**十六次看過以
至點句標**題**手澤具存公歷**幸**太宗真宗
仁宗三朝引年七十累章求解禁職以太子
少保致仕享年八十四道德文章具載國史
冠歲過高士劉惟一訪以生滅之事劉曰人常
不死公駭之劉曰形死性不滅公始寤**其**說自
是留意禪觀老而愈篤公平生所**學**三教俱

通文集外着昭德編三卷法藏碎金十卷道院

49 下

集十五卷毫智餘書三卷皆明理性晚年尚
看壇經孜孜如此子健來佐蘄春郡遇太守
高公世與篤信好佛一日語及先文元公所觀
壇經欣然曰此乃六祖傳衣之地是經安可
闕乎乃用其句讀鏤版刊行以廣其傳壇
經曰後人得遇壇經如親承吾教若看壇經
必當見性咸願衆生同證此道紹興二十三年
六月二十日右奉議郎權通判蘄州軍州事
晁子健謹記

50 上

六祖壇經卷上

一緣起說法門 二悟法傳衣門
三為時衆說定慧門 四教授坐禪門
五說傳香懺悔發願門 六說一體三身佛相門
一緣起說法門

大師唐時初從南海上至曹溪韶州刺史韋璩等請於大
梵寺講堂中為衆開緣授無相戒說摩訶般若波羅蜜法

大師是日說頓教法直了見性無礙普告僧俗令言下各
悟本心現成佛道座下僧尼道俗一千餘人刺史官寮等
三十餘人儒宗學士三十餘人同請大師說是法門刺史
韋璩令門人法海抄錄流行傳示後代若承此宗旨學
者遞相教授者有所依憑耳

二悟法傳衣門

余時大師既升座已而示衆言善知識總淨心念摩訶般

若波羅蜜大師良久不語自淨其心忽然告言善知識菩
提自性本來清淨但用此心直了成佛善知識且聽惠能
行由得法事意惠能嚴父本貫范陽左降流于嶺南作新
州百姓此身不幸父又早亡老母孤遺移來南海艱辛貧
乏於市賣柴時有一客買柴使令送至官店客收去惠能
得錢却出門外見有一客讀金剛經惠能一聞心便開悟
遂問客言從何所來持此經典客云我從蘄州黃梅縣東
50 下

馮母山來其山是第五祖弘忍大師在彼主化門人一千
有餘我到彼山禮拜聽授此經大師常勸僧俗但持金剛

經即自見性直了成佛惠能聞說宿業有緣乃蒙一客取銀十兩與惠能令充老母衣糧教便往黃梅禮拜五祖惠能安置母畢便即辭親不經三二十日便至黃梅禮拜五祖師問曰汝何方人來到此山禮拜今向吾邊欲求何物惠能對云弟子是嶺南新州百姓遠來禮師唯求作佛不

求餘物五祖言汝是嶺南人又是獼獠若為堪作佛惠能言人雖有南北佛性本無南北獼獠身與和尚不同佛性有何差別大師更欲共惠能久語且見徒衆總在身邊乃令隨衆作務惠能啟和尚言弟子自心常生智慧不離自性即是福田未審和尚教作何務五祖言這獼獠根性大利汝更勿言且去後院有一行者差惠能破柴踏碓八箇餘月五祖一日忽見惠能言吾思汝之見可用恐有惡人

害汝遂不與汝言知之否惠能言弟子亦知師意不敢行至堂前令人不覺五祖一日喚諸門人總來吾向汝說世人生死事大汝等終日供養只求福田不求出離生死苦海自性若迷福何可救汝等各去後院自看智慧取自本心般若之性各作一偈來呈吾看若悟大意付汝衣法為第六代祖火急速去不得遲滯思量即不中用見性之人言下須見若如此者輪刀上陣亦得見之衆得處分來至51 上

後院遞相謂曰我等衆人不須澄心用意作偈將呈和尚有何所益神秀上座現為教授師必是他得我輩謾作偈頌枉用心力諸人聞語各自息心咸言我等已後依止秀師何煩作偈神秀思惟諸人不呈偈者為我與他為教授師我須作偈將呈和尚若不呈偈和尚如何知我心中見解深淺我呈偈意求法即善覓祖即惡却同凡心奪其聖位無別若不呈偈終不得法大難大難五祖堂前有步廊

三間擬請供奉盧珍畫楞伽經變相及五祖血脉圖流傳供養神秀作偈成已數度欲呈行至堂前心中恍惚遍身汗流擬呈不得前後經四日一十三度呈偈不得秀乃思惟不如向廊下書着從他和尚看見忽若道好即出頂禮云是秀作若道不堪枉向山中數年受人禮拜更修何道言訖夜至三更不使人知自執燈燭於南廊中間壁上書無相偈呈心所見神秀偈曰

身是菩提樹 心如明鏡臺 時時勤拂拭 莫使染塵埃

秀書偈了便却歸房人總不知神秀思惟五祖明日見偈歡喜出見和尚即言秀作若言不堪自是我迷宿業障重不合得法聖意難測房中思想坐臥不安直至五更五祖即知神秀入門未得不見自性喫粥了便即天明五祖方便喚盧供奉來擬向南廊畫五代血脉供養五祖忽見其偈報言供奉却不畫也輒奉十千勞供奉遠來金剛經云51 下

凡所有相皆是虛妄不如留此偈令迷人誦依此偈修免墮三惡道依此修行人天有利益五祖喚門人燒香偈前令凡人見生敬重心汝等盡須誦此悟此偈者即得見性依此修行必不墮落門人盡誦皆歎善哉五祖三更喚秀入堂問是汝作此偈否若是汝作應得悟法秀言罪過實是秀作亦不求祖位望和尚慈悲看弟子心中有少智慧否五祖言汝作此偈未見本性只到門上未入門內凡愚

依此修行即不墮落如此見解覓無上菩提即不可得無上菩提須得言下識自本心見自本性不生不滅於一切時中念念自見萬法無滯一真一切真萬境自如如之心即是真實若如是見者即是無上菩提之自性也五祖言汝且去一兩日思惟更作一偈將來吾看汝偈若入得門見自本性付汝衣法吾不惜法汝見自遲神秀作禮便出又經數日作偈不成心中恍惚神思不安猶如夢中行

坐不樂復經兩日有一童子於碓坊過倡誦其偈惠能一聞便知此偈未見本性惠能未蒙教授早識大意遂問童子言誦者是何偈童子曰尔這獼猴不知大師言世人生死事大欲得傳付衣法令門人作偈來看若悟大意即付衣法為第六祖神秀上座於南廊壁上書無相偈五祖令門人盡誦此偈若得悟者即見自性成佛依此修行即不墮落惠能言上人我在此踏碓八個餘月未曾行到堂前52 上

望上人引至偈前禮拜亦要誦此結來生緣同生佛地童子便引惠能到南廊禮拜偈頌為不識字請一上人為讀若得聞之願生佛會時有江州別駕姓張名日用便高聲讀惠能一聞即識大意因自言亦有一偈望別駕書于壁上別駕言獼猴汝亦作偈其事希有惠能啟別駕言若學無上菩提不得輕於初學俗諺云下下人有上上智上上人有沒意智若輕人即有無量無邊罪張日用言汝但誦

偈吾為汝書于壁上汝若得法先須度吾勿忘此言惠能偈云

菩提本無樹 明鏡亦非臺 本來無一物 何處有塵埃
說此偈已僧俗總驚山中徒衆無不嗟訝各相謂言奇哉
不得以貌取人何得多時使他肉身菩薩五祖見衆人盡
恠恐人損他向後無人傳法遂便混破向衆人言此偈亦
未見性云何讚歎衆便息心皆言未了各自歸房更不讚

歎五祖夜至三更喚惠能於堂內以袈裟遮圍不令人見
為惠能說金剛經恰至應無所住而生其心言下便悟一
切萬法不離自性惠能啟言和尚何期自性本自清淨何
期自性本不生滅何期自性本自具足何期自性本無動
搖能生萬法五祖知悟本性乃報惠能言不識本心學法
無益若言下識自本心見自本性即名丈夫天人師佛三
更受法人盡不知便傳頓教及衣鉢云汝為第六代祖善
52 下

自護念廣度迷人衣為信稟代代相承法即以心傳心皆
令自悟自解自古佛佛唯傳本體師師默付本心令汝自
見自悟五祖言自古傳法命似懸絲若住此間有人害汝
汝須速去惠能言本是南中人久不知此山路如何出得
江口五祖言汝不須憂吾自送汝其時領得衣鉢三更便
發南歸五祖相送直至九江驛邊有一隻船子五祖令惠
能上船五祖把櫓自搖惠能言請和尚坐弟子合搖櫓五

祖言只合是吾度汝不可汝却度吾無有是處惠能言弟
子迷時和尚須度今吾悟已過江搖櫓合是弟子度之度
名雖一用處不同惠能生在邊方語又不正蒙師教旨付
法今已得悟即合自性自度五祖言如是如是但依此見
已後佛法大行矣汝去後一年吾即前逝五祖言汝今好
去努力向南五年勿說佛法難起已後行化善誘迷人若
得心開與吾無別辭違已了便發向南兩月中間至大庾

嶺不知逐後數百人來趨欲奪衣取法來至半路盡總却
迴唯一僧俗姓陳名惠明先是四品將軍性行麤惡直至
大庾嶺頭趨及惠能便還衣鉢又不肯取言我欲求法不
要其衣惠能即於嶺頭便傳正法惠明聞法言下心開惠
能却令向北接人惠能後至曹溪又被惡人尋逐乃於四
會縣避難經五年常在獵人中雖在獵中每與獵人說法
至高宗朝到廣州法性寺值印宗法師講涅槃經時有風

53 上

吹幡動一僧云幡動一僧云風動惠能曰非幡動風動人心自動印宗聞之竦然惠能東山得法辛苦受盡命似懸絲今日大眾同會得聞乃是過去千生曾供養諸佛方始得聞無上自性頓教惠能與使君及官僚道俗有累劫之因教是先代聖傳不是惠能自智願聞先聖教者各令淨心聞了各曰自除疑如先代聖人無別善知識菩提般若之智世人本自有之只緣心迷不能自悟須求大善知識示

道見性善知識智人佛性本無差別只緣迷悟不同

所以有愚有智

祖謂明日不思善不思惡正與麼時如何是上座本來面目明大悟

三為時衆說定慧門

師言善知識我此法門以定慧為本大眾勿迷言定慧別定慧體不是二定是慧體慧是定用即慧之時定在慧即定之時慧在定若識此義即是定慧等學諸學道人莫言先定發慧先慧發定各別作此見者法有二相口說善語心中

不善空有定慧定慧不等若心口俱善內外一種定慧即等自悟修行不在於淨若淨先後即同迷人不斷勝負却增法我不離四相善知識一行三昧者於一切處行住坐臥常行一直心是也如淨名經云直心是道場直心是淨土莫心行詭曲口但說直口說一行三昧不行直心但行直心於一切法勿有執着迷人着法相執一行三昧直言坐不動妄不起心即是一行三昧作此解者即同無情却卻是障道因緣善知識道須通流

53 下

何以却滯心不住法道即通流心若住法名為自縛若言坐不動是只如舍利弗宴坐林中不合被維摩詰呵善知識又見有人教坐看心看淨不動不起從此置功迷人不會便執成顛如此者衆矣如是相教故知大錯善知識定慧猶如何等猶如燈光有燈即光無燈不光燈是光之體光是燈之用名雖有二體本同一此定慧法亦復如是善知識本來正教無有頓漸人性自有利鈍迷人漸契悟人

頓修自識本心自見本性即無差別所以立頓漸之假名善知識我此法門從上已來先立無念為宗無相為體無住為本無相者於相而離相無念者於念而不念無住者人之本性於世間善惡好醜乃至冤之與親言語觸判欺爭之時並將為空不思酬害念念之中不思前境若前念

今念後念念相續不斷名為繫縛於諸法上念念不住即無縛也此是以無住為本善知識外離一切相名為無

相能離於相即法體清淨此是以無相為體善知識於諸境上心不染曰無念於自念上常離諸境不於境上生心若百物不思念盡除却一念絕即死別處受生學道者思之莫不識法意自錯猶可更勸他人自迷不見又謗佛經所以立無念為宗善知識云何立無念為宗只緣口說見性迷人於境上有念念上便起邪見一切塵勞妄相從此而生自性本無一法可得若有所得妄說禍福即是塵勞

54 上
邪見故此法門立無念為宗善知識無者無何事念者念何物無者無二相無諸塵勞之心念者念真如本性真如即是念之體念即是真如之用真如自性起念非眼耳鼻舌能念真如有性所以起念其如若無眼耳鼻聲當時即壞善知識真如自性起念六相雖有見聞覺知不染萬境而真性常自在外能分別諸色相內於第一義而不動善諸識此門坐禪元不着心亦不着淨亦不是不動若言着

心心元是妄知心如幻故無所着也若言着淨人性本淨由妄念故蓋覆真如但元無想性自清淨起心着淨却生淨妄無處所着者是妄淨無形相却立淨相言是功夫作此見者障自本性却被淨縛善知識若修不動者但見一切人時不見人之是非善惡過患即是自性不動善知識迷人身雖不動開口便說他人是非長短好惡與道違背也若着心着淨者却障道也

四教授坐禪門

師言知識何名坐禪此法門中無障無碍外於一切善惡境界心念不起名為坐內見自性不動名為禪善知識何名禪定外離相為禪內不亂為定外若着相內心即亂外若離相心即不亂本性自淨自定只為見境思境即亂若見諸境心不亂者是真定也善知識外離相即禪內不亂即定外禪內定是為禪定淨名經云即時豁然還得本心

54 下
菩薩戒經云我本元自清淨善知識於念念中自見本性清淨自修自行自成佛道

五傳香懺悔發願門

師言善知識一會在此皆共有緣今各胡跪傳自性五分

法身香一戒香即自心中無非無惡無疾妬無貪嗔無劫害名戒香二定香即觀諸善惡境相自心不亂名定香三慧香自心無礙常以智慧觀照自性不造諸惡雖修衆善

心不執着畏上愛下矜孤恤貧名慧香四解脫香即自心無所攀緣不思善不思惡自在無碍名解脫香五解脫知見香自心既無所攀緣善惡不可沉空守寂即須廣學多聞識自本心達諸佛理言滿天下無口過行滿天下無怨惡和光接物無我無人直至菩提真性不易名解脫知見香善知識此香各自內薰莫於外覓今與善知識授無相懺悔滅三世罪令得三業清淨善知識各隨語一時道弟

子等從前念今念及後念念不被愚迷染從前所有惡業愚迷等罪悉皆懺悔願一時消滅永不復起弟子等從前念今念及後念念不被僞誑染從前所有惡業僞誑等罪悉皆懺悔願一時消滅永不復起弟子等從前念今念及後念念不被疽妬染所有惡業疽妬等罪悉皆懺悔願一時消滅永不復起善知識已上是為無相懺悔云何名懺云何名悔懺者懺其前愆從前所有惡業愚迷僞誑疽妬等罪悉皆盡懺願不復起是名為懺悔者悔其後過從今已後所有惡業愚迷僞誑疽妬等罪今已覺悟悉皆永斷不復更作是名為悔故稱懺悔凡夫愚迷只知懺其前愆不知悔其後過以不悔故前愆不滅後過又生前愆既不滅後過復又生何名懺悔善知識既懺悔已與善知識發四弘誓願各次用心正聽自心邪迷無邊誓願度自心煩惱無邊誓願斷自性法門無盡誓願學自性無上

佛道誓願成師言善知識大家豈不道衆生無邊誓願度恁麼道是不是惠能度善知識心中衆生所謂邪迷心誑妄心不善心疽妬心惡毒心如是等心盡是衆生各須自性自度是名真度何名自性自度即自心中邪見煩惱愚癡衆生將正見度既有正見使般若智打破愚癡迷妄衆生各各自度邪來正度迷來悟度愚來智度惡來善度如是度者名為真度又煩惱無邊誓願斷將自性般若智除

却虛妄思想心是也又法門無盡誓願學須自見性常行正法是名真學又無上佛道誓願成既常能下心行於真正離迷離覺常生般若除真除妄即見佛性即言下佛道

却虛妄思想心是也又法門無盡誓願學須自見性常行正法是名真學又無上佛道誓願成既常能下心行於真正離迷離覺常生般若除真除妄即見佛性即言下佛道

成常念修行是願力法師言善知識今發四弘願了更與善知識授無相三皈依戒善知識皈依覺二足尊皈依正離欲尊皈依淨衆中尊從今日去稱覺為師更莫皈依邪魔外道以自性三寶常自證明勸善知識皈依自性三寶
55 下

佛者覺也法者正也僧者淨也自心皈依覺邪迷不生少欲知足能離財色名二足尊自心皈依正念念無邪見以無邪見故即無人我貢高貪愛執着名離欲尊自心皈依淨一切塵勞妄念雖在自性皆不染着名衆中尊若修此行是自皈依凡夫不會從日至日受三皈依戒若言皈依佛佛在何處若不見佛憑何所皈依言却成妄善知識各自觀察莫錯用心經文分明言自皈依佛不言皈依他佛自性

不皈依無所依處今既自悟各須皈依自心三寶內調心性外敬他人是自皈依也

六說一體三身佛門

師言善知識各各至心惠能與說一體三身自性佛令善知識見三身了然自悟自性總隨惠能道於自色身皈依清淨法身佛於自色身皈依千百億化身佛於自色身皈依圓滿報身佛已上三遍唱善知識色身是舍宅不可言歸向者三

身佛在自性中世人總有為自心迷不見內性外覓三身如來不見自身中有三世佛善知識聽說令善知識於自身中見自性有三世佛此三身佛從自性生不從外得何名清淨法身世人性本清淨萬法從自性生思量一切惡事即生惡行思量一切善事即生善行如是諸法在自性中如天常清日月常明為浮雲蓋覆上明下暗忽遇風吹雲散上下俱明萬象皆現世人性常浮游如彼天雲善知
56 上

識智如日慧如月智慧常明於外着境被妄念浮雲蓋覆自性不得明朗若遇善知識聞真正法自除迷妄內外明徹於自性中萬法皆現見性之人亦復如是此名清淨法身佛善知識自心皈依自性是皈依真佛自歸依者除却自性中不善心疽妬心憍慢心吾我心誑妄心輕人心慢他心邪見心貢高心及一切時中不善之行常自見已過不說他人好惡是自皈依常須下心普行恭信即是見性

通達更無滯礙是自皈依何名千百億化身若不思萬法性本如空一念思量名為變化思量惡事化為地獄思量

善事化為天堂毒害化為龍蛇慈悲化為菩薩智慧化為
上界愚癡化為下方自性變化甚多迷人不能省覺念念
起惡常行惡道迴一念善智慧即生此名自性化身佛何
名圓滿報身譬如一燈能除千年闇一智能滅萬年愚莫
思向前已過不可得常思於後念念圓明自見本性善惡

雖殊本性無二無二之性名為實性於實性中不染善惡
此名圓滿報身佛師又言自性起一念惡滅萬劫善因自
性起一念善得恒沙惡盡直至無常念念自見不失本念
名為報身善知識從法身思量即是化身佛念念自性自
見即是報身佛自悟自修自性功德是真皈依皮肉是色
身色身是宅舍不言皈依也但悟自性三身即識自性大意
六祖壇經卷上

56 下

六祖壇經卷下

七說摩訶般若波羅蜜門

八問答功德及西方相狀門

九諸宗難問門

十南北二宗見性門

十一教示十僧傳法門

七說摩訶般若波羅蜜門

師言善知識既識三身佛了更為說摩訶般若波羅蜜法
各各至心諦聽世人終日口念不識自性猶如誦食不飽
口但說空萬劫不得見性終無有益善知識摩訶般若波
羅蜜是梵語此言大智慧到彼岸此須心行不在口念口
念心不行如幻如化如露如電口念心行即心口相應本
性是佛離性無別佛何名摩訶摩訶是大心量廣大猶如
虛空無有邊畔亦無方圓大小亦非青黃赤白亦無上下

長短亦無嗔無喜無是無非無善無惡無有頭尾諸佛刹
土盡同虛空世人妙性本空無有一法可得自性真空亦
復如是善知識今聞惠能說空便即着空第一莫着空若
空心靜坐即落無記空終不成佛法善知識世界虛空能
含萬物色象日月星宿山河泉源溪澗一切樹木惡人善
人惡法善法天堂地獄一切大海須彌諸山總在空中世
人性空亦復如是善知識自性能含萬法是大萬法在善

57 上

原闕

57 下

破五蘊煩惱塵勞若此修行定成佛道變三毒為戒定慧善知識我此法門從一般若生八萬四千智慧何以故為世人有八萬四千塵勞若無塵勞智慧常現不離自性悟此法者即是無念無憶無着不起誑妄用自真如性以智慧觀照於一切法不取不捨即是見性成佛道善知識若欲入甚深法界及般若三昧者須修般若行持誦金剛般若經即得見性當知此功德無量無邊經中分明讚歎不

能具說此法門是取上乘為大智人說為上根人說小根小智人聞心生不信何以故譬如大龍下雨於閩浮提城邑聚落悉皆漂流如漂棗葉若雨大海不增不減若大乘人若取上乘人聞說金剛經心開悟解故知本性自有般若之智自用智慧常觀照故不假文字譬如雨水不從天有元是龍能興致令一切衆生一切草木有情無情悉皆蒙潤諸水衆流却入大海合為一體衆生本性般若之智

亦復如是善知識小根之人聞此頓教猶如草木根性自小若被大雨悉皆自倒不能增長小根之人亦復如是元有般若之智與大智人更無差別因何聞法不自開悟緣邪見障重煩惱根深猶如大雲覆蓋於日不得風吹日光不現般若之智亦無大小為一切衆生自心迷悟不同迷心外見修行覓佛未悟自性即是小根若開悟頓教不執外修但於自心常起正見煩惱塵勞常不能染即是見性善

58 上

知識內外不住去來自由能除執心通達無碍能修此行與般若經本無差別善知識一切經書及諸文字大小二乘十二部經皆因人置因智慧性方能建立若無世人一切萬法本自不有故知萬法本因人興一切經書因人說有緣其人中有愚有智愚為小人智為大人愚者問於智人智者與愚人說法令其悟解心開愚人忽悟解心開即與智人無別善知識不悟即佛是衆生一念悟時衆生是

佛故知萬法盡在自心何不從自心中頓見真如本性菩薩戒經云我本元自性清淨若識自心見性皆成佛道淨名經云即時豁然還得本心善知識我於忍和尚處一聞言下便悟頓見真如本性是以將此教法流行令學道者頓悟菩提各自觀心自見本性若自不悟須覓大善知識解取上乘法者直示正路是善知識有大因緣所謂化導

令得見性一切善法因善知識能發起故三世諸佛十二

部經在人性中本自具有不能自悟須求善知識示導方見若自悟者不假外求若須要善知識望得解脫者無有是處何以故自心內有知識自悟若起邪迷妄念顛倒外善知識雖有教授救不可得若起正真般若觀照一剎那間妄念俱滅若識自性一悟即至佛地善知識智慧觀照內外明徹識自本心若識本心即求解脫若得解脫即是般若三昧即是無念何名無念若見一切法心不染着是58 下

為無念用即遍一切處亦不着一切處但淨本心使六識從六門走出於六塵中無染無雜來去自由通同無滯即是般若三昧自在解脫名無念行若百物不思當令念絕即是法縛即名邊見善知識悟無念法者萬法盡通悟無念法者見諸佛境界悟無念法者至佛位地善知識後代得吾法者常見吾法身不離汝左右善知識將此頓教法門於同見同行發願受持如事佛故終身而不退者欲入

聖位然須傳受從上以來默傳分付不得匿其正法若不同見同行在別法中不得傳付損彼前人究竟無益恐愚人不解謗此法門百劫千生斷佛種性善知識吾有一無相頌若能誦取言下令汝迷罪消滅頌曰

迷人修福不修道 只言修福便是道 布施供養福無邊 心中三惡元來造 擬將修福欲滅罪 後世得福罪還在 但向心中除罪緣 各自性中真懺悔 忽悟大乘真懺悔

除邪行正即無罪 學道常於自性觀 即與諸佛同一類 五祖唯傳此頓法 普願見性同一體 若欲當來覓法身 離諸法相心中洗 努力自見莫悠悠 後念忽絕一世休 若悟大乘得見性 虔恭合掌至心求

師言今於大梵寺中說此頓教普願法界衆生於此言下見性成佛師說法了韋使君與官員道俗一時作禮無不悟者皆歎善哉何期嶺南有佛出世

59 上

八問答功德及西方相狀門

尒時韋使君再肅容儀禮拜問曰弟子聞和尚說法實不可思議今有少疑欲問和尚願大慈悲特為解說師曰有疑即問何須再三韋公曰和尚所說可不是達磨大師宗旨乎師曰是公曰弟子聞達磨初化梁武帝帝問云朕一

生造寺供僧布施設齋有何功德達磨言實無功德武帝
悵悵不稱本情遂令達磨出境弟子未達此理願和尚為

說達磨意旨如何師曰實無功德勿疑先聖之言武帝心
邪不知正法造寺供養布施設齋名為求福不可將福便
為功德功德在法身中不在修福師又曰見性是功平等
是德念念無滯常見本性真實妙用名為功德外行於禮
是功內心謙下是德自性建立萬法是功心體離念是德
不離自性是功應用無染是德若覓功德法身但依此作
是真功德若修功德之人心即不輕常行普敬也師曰心

常輕人吾我不斷即自無功自性虛妄不實即自無德為
吾我自大常輕一切故善知識念念無間是功心行平直
是德自修身是功自修性是德善知識功德須自性內見
不是布施供養之所求也是以福德與功德別武帝不識
真理非我祖師有過又問弟子常見僧俗念阿彌陀佛願
生西方請和尚說得生彼否願為破疑師言使君善聽惠
能與說世尊在舍衛城中說西方引化經文分明去此不
59 下

遠若論相說理即有十萬八千若說身中十惡八邪便是
說遠為其下根說近為其上智人有兩種法無兩般迷悟
有殊見有遲疾迷人念佛求生於彼悟人自淨其心所以
佛言隨其心淨即佛土淨使君東方人但心淨即無罪雖
西方人心不淨亦有愆東方人造罪念佛求生西方西方
人造罪念佛求生何國凡愚不了自性不識身中淨土願
東願西悟人在處一般所以佛言隨所住處常安常樂使

君心地但無不善西方去此不遙若懷不善之心念佛往
生難到今勸善知識先除十惡即行十善後除八邪乃過
八千念念見性常行平直到如彈指便覩彌陀使君但行
十善何須更願往生不斷十惡之心何佛即來迎請若悟
無生頓法見西方只在剎那不悟念佛求生路遙如何得
達惠能與諸人移西方如剎那間目前便見各願見否皆
頂禮言若此處見何須更願往生願和尚慈悲便現西方

普願得見師言大眾世人自色身是城眼耳鼻舌是門外
有五門內有意門心是地性是王王居心地上性在王在
性去王無性在身心存性去身心壞佛向性中作莫向身
外求自性迷即是眾生自性覺即是佛慈悲即是觀音喜

捨名^為勢至能淨即釋迦平直即彌陀人我是須彌邪心
是海水煩惱是波浪毒害是惡龍^虛妄是鬼神塵勞是魚
^鼈貪嗔是地獄愚癡是畜生善知識常行十善天堂便至
60 上

除人我須彌倒無邪心海水竭煩惱無波浪滅毒害除魚
龍絕自心地上覺性如來放大光明外照六門清淨能破
六欲諸天自性內照三毒即除地獄等罪一時消散內外
明澈不異西方不作此修如何到彼大眾聞^說俱歎善哉
曰但是迷人了然見性悉皆禮拜^唯言普願法界衆生聞
者一時悟解師言善知識若欲修行在家亦得不由在寺
在家能行如東方人心善在寺不修如西方人心惡但心

清淨即是自性西方韋公又問在家如何修行願為教授
師言吾與大眾作無相頌但依此修常與吾同處無別若
不依此行雖在吾邊如隔千里頌曰

^說 通及心通	如日處虛空	惟傳見性法	出世破邪宗
法即无 ^頓 漸	迷悟有遲疾	只此見性門	愚人不可悉
^說 即雖萬般	合理還歸一	煩惱暗宅中	常須生慧日
邪來煩惱至	正來煩惱除	邪正俱不用	清淨至無餘

菩提本自性	起心即是妄	淨心在妄中	但正無三障
世人若修道	一切盡不妨	常自見己過	與道即相當
色類自有道	各不相妨惱	離道別覓道	終身不見道
波波度一生	到頭還自懊	欲得見 ^真 道	行正即是道
自若無道心	闇行不見道	若 ^真 修道人	不見世間過
若見他人非	自非却是左	他非我不非	我非自有過
但自却非心	打除煩惱破	^憎 愛不關心	長伸兩腳臥

60 下

欲擬化他人 自須有方便 勿令彼有疑 即是自性現
佛法在世間 不離世間覺 離世覓菩提 恰如求^{兔角}
正見名出世 邪見是世間 邪正盡打却 菩提性宛然
此頌是^頓教 亦名大法船 迷聞經累劫 悟則剎那間
師言善知識^總須誦取依^偈修行言下見性雖去吾千里
如常在吾邊於此言下不悟即對面千里各各自修法不
相待衆人且散吾歸曹溪衆若有疑却來相問為衆破疑

各見本心時^{會僧}俗豁然大悟咸讚善哉俱明佛性

九諸宗難問門

大師出世行化四十年諸宗難問^僧俗約千餘人皆起惡

心難問師言一切盡除無名可名名於自性無二之性是名實性於實性上建立一切教門言下便須自見諸人聞說總皆頂禮請事為師願為弟子如此之徒說不可盡若論宗旨傳授壇經者即有稟承所付須知去處年月時代

姓名遞相付囑若無壇經稟承者即非南宗弟子緣未得所稟雖說頓法未契本心終不免諍但得法者只勸修行諍是勝負之心與道相違矣

十南北二宗見性門

世人盡言南能北秀未知事由且秀大師在荊南當陽縣玉泉寺住能大師在韶州城東四十五里曹溪山住法本一宗人有南北何名頓漸法即一種見有遲疾法無頓漸61 上

人有利鈍故名頓漸秀聞能師說法徑疾直指見性遂命門人志誠曰汝聰明多智可與吾到曹溪山禮拜但坐聽法莫言吾使汝來汝若聽得盡心記取却來說吾看彼所見誰遲誰疾火急早來勿令吾恠志誠禮拜便行經五十餘日至曹溪山禮師坐聽不言來處志誠一聞言下便悟即起禮拜自言和尚弟子在玉泉寺秀和尚處學道九年不得契悟今聞和尚一說忽然悟解便契本心和尚大慈

弟子生死事大又恐輪迴願當教示師曰汝從玉泉寺來應是細作對曰不是師曰何得不是對曰未說是說了不是師曰煩惱菩提亦復如是師問志誠曰吾聞汝禪師教示學人唯傳戒定慧未審汝師說戒定慧行相如何與吾說看志誠曰秀和尚說諸惡不作名為戒諸善奉行名為慧自淨其意名為定此是戒定慧彼說如此未審和尚所見如何願為解說師曰秀和尚所見實不可思議吾所見

戒定慧又別志誠啟和尚戒定慧只合一種如何更別師曰汝師戒定慧接大乘人吾戒定慧接取上乘人悟解不同見有遲疾汝聽吾說與彼同否吾所說法不離自性離體說法名為相說自性常迷須知一切萬法皆從自性起用是真戒定慧等法常見自性自心即是自性等佛吾心地無非自性戒心地無癡自性慧心地無亂自性定汝師戒定慧勸小根智人吾戒定慧勸大根智人若悟自性亦61 下

不立菩提涅槃亦不立解脫知見無一法可得方能建立萬法是真見性若解此意亦名佛身亦名菩提涅槃亦名

解脫知見亦名十方國土亦名恒沙數亦名三千大千亦名大小藏十二部經見性之人立亦得不立亦得去來自由無滯無礙應用隨作應語隨答普見化身不離自性即得自在神通遊戲三昧之力此名見性志誠再啟和尚如何是不立義師曰自性無非無癡無亂念念般若觀照常

離法相自由自在縱橫盡得有何可立自性自悟頓悟頓修亦無漸次所以不立一切法佛言寂滅有何次第志誠禮拜便住曹溪願為門人不離左右復有一僧名曰法達常誦法華經七年心迷不悟正法來詣曹溪禮拜問曰和尚弟子誦法華經心常有疑又不知正法之處和尚智慧廣大願為決疑師曰法達法即甚達汝心不達經本無疑汝心自疑汝心自邪則求正法吾心本正則是持經吾不

識文字汝取經來誦之一遍吾聞即知法達取經便讀一遍師知佛意乃與說經師言法達經無多語十卷盡是譬喻因緣如來廣說三乘只為世人根鈍經文分明無有餘乘唯一佛乘汝聽一佛乘莫求二乘迷却汝性且經中何處是一佛乘吾聞汝誦經云諸佛世尊唯以一大事因緣故出現於世正法有十六字此法如何解如何修汝用心聽吾為汝說師言法達人心何不思本來寂靜離却邪見即是大
62 上

事因緣內外不迷即離兩邊外迷着相內迷着空於相離汝相於空離空即是內外不迷若悟此法一念心開出現於世心開何事開佛知見佛猶覺也分為四門開覺知見示覺知見悟覺知見入覺知見此名開示悟入從一處入即覺知見見自本性即得出現師言吾勸一切人於自心地常開佛知見世人心邪愚迷造罪口善心惡貪嗔嫉妬讒妄侵害自開眾生知見世人心正常起智慧觀照自心止

惡行善自開佛知見汝須念念開佛知見莫開眾生知見開佛知見即是出世開眾生知見即是世間師又言法達此是法華經一乘之義向下分之為三乘者蓋為迷人汝但依一佛乘修行師又言法達心行即是汝轉法華經不行即是被法華經轉心正轉法華心邪法華轉開佛知見轉法華努力依法修行即是轉經自心若不念念修行即常被經轉法達一聞言下大悟涕淚悲泣白大師言實未

曾轉法華七年被法華轉自今方修佛行師言行佛行是

佛時在會者各得見性復有僧名曰智常禮拜問四乘之義云啟和尚佛說三乘法又言取上乘弟子不解願為教授師曰汝向自心見莫着外法相無四乘法人心自有四等見聞轉讀是小乘悟法解義是中乘依法修行是大乘萬法盡通萬行俱備一切不染離諸法相一無所得名取上乘乘是行義不在口諍汝須自修莫問吾也一切時中

62 下

自性自如是四乘義又玉泉寺有一童子年十三歲當陽縣人名曰神會禮拜三拜問曰和尚坐禪還見不見師以柱杖打三下却問吾打汝痛不痛對云亦痛亦不痛師曰吾亦見亦不見神會問如何是亦見亦不見師言吾之所見常見自心過愆不見他人是非好惡所以亦見亦不見汝言亦痛亦不痛如何汝若不痛同其木石若痛即同凡夫即起於恨師曰神會小兒向前見不見是二邊痛不痛

屬生滅汝自性且不見敢來弄人神會禮拜悔謝更不敢言師又曰汝若心迷不見問善知識覓路汝若心悟即自見性依法修行汝自迷不見自心却來問吾見與不見吾見自知豈代汝迷汝若自見亦不代吾迷何不自知自見乃問吾見與不見神會禮百餘拜求謝愆過請事為師不離左右

十一教示十僧傳法門 滅度年月附

尔時師喚門人法海志誠法達神會智常智通志徹志道法珙法如等言汝等十人向前汝等不同餘人吾滅度後各為一方師吾今教汝說法不失本宗先須舉三科法門動用三十六對出沒即離兩邊說一切法莫離自性忽有人問汝法出語盡雙皆取對法來去相因究竟二法盡除更無去處三科法門者陰界入也陰是五陰色受想行識是也入是十二入外六塵色聲香味觸法內六門眼耳鼻

63 上

舌身意是也界是十八界六塵六門六識是也自性但含萬法名含藏識若起思量即是轉識生六識出六門見六塵三六一十八由自性起用自性若邪起十八邪合若正起十八正合惡用即衆生用善用即佛用用由何等由自性有對法外境無情五對天與地對日與月對明與暗對陰與陽對水與水對此是五對也法相語言十二對語與法對有與無對有色與無色對有相與無相對有漏與無漏對色

與空對動與靜對清與濁對凡與聖對僧與俗對老與少

對大與小對此是十二對也自性起用十九對長與短對邪與正對癡與慧對愚與智對亂與定對慈與毒對戒與非對直與曲對實與虛對險與平對煩惱與菩提對常與無常對悲與害對喜與嗔對捨與慳對進與退對生與滅對法身與色身對化身與報身對此是十九對也師言此是三十六對法若解用即通貫一切經法出入即離兩邊

自性動用共人言語外於相離相內於空離空若全着相即長邪見若全執空即長無明執空之人有謗經直言不用文字既云不用文字人亦不合語言只此語言便是文字之相又云直道不立文字即此不立兩字亦是文字見人所說便即謗他言着文字汝等須知自迷猶可又謗佛經不要謗經罪障無數着相於外而作法求真或廣立道場說有無之過患如是之人累劫不可見性不勸依法修
63 下

行但只聽說修行又莫百物不思而於道性窒礙若聽說不修令人反生邪念但依法修行無住相法施汝等若悟依此說依此用依此行依此作即不失本宗若有人問汝義問有將無對問無將有對問凡以聖對問聖以凡對二法相因生中道義教汝一問一對餘問一依此作即不失理也設有人問何名為暗答云明是因暗是緣明沒即暗以明顯暗以暗現明來去相因成中道義餘問悉皆如此師

教十僧於後傳法以壇經迭相教授即不失宗旨汝今已得法了遞代流行後人得遇壇經如親承吾教若看壇經必當見性大師以先天元年於新州國恩寺造塔至二年七月八日喚門人告別師言汝等近前吾至八月欲離世間汝等有疑早須相問為汝破疑當令迷盡使汝安樂吾若去後無人教汝法海等聞悉皆涕泣唯有神會不動神情亦無涕泣師曰神會小師却得善不善等毀毀譽不動餘

者不得數年在山修行何道汝今悲泣為憂阿誰若憂吾不知去處吾自知去處吾若不知去處終不別汝汝等悲泣蓋為不知吾去處若知吾去處即不合悲泣法性本無生滅去來汝等盡坐吾與汝等一偈名曰真假動靜偈汝等誦取此偈與吾意同依此修行不失宗旨眾僧作禮請師說偈偈曰

一切無有真 不以見於真 若見於真者 是見盡非真
64 上

若能自有真 離假即心真 自心不離假 無真何處真
有情即解動 無情即不動 若修不動行 同無情不動
若覓真不動 動上有不動 不動是不動 無情無佛種
能善分別相 第一義不動 但作如此見 即是真如用
報諸學道人 努力須用意 莫於大乘門 却執生死智
若言下相應 即共論佛義 若實不相應 合掌令歡喜
此宗本無諍 諍即失道意 執迷諍法門 自性入生死

時衆僧聞知大師意更不敢諍各自攝心依法修行一時
禮拜即知大師不久住世法海上座問曰和尚去後衣法
當付何人師曰吾於大梵寺說法直至今日抄錄流行名
法寶壇經記汝等守護度諸羣生但依此說是真正法師
言法海向前吾滅度後二十年間邪法撩亂惑我正宗有
一人出來不惜身命定於佛法豎立宗旨即是吾法弘於
河洛此教大行若非此人衣不合傳汝若不信吾與汝說

先祖達磨大師傳衣偈頌據此偈頌之意衣不合傳偈曰
吾本來東土 說法救迷情 一花開五葉 結果自然成
師曰吾有一偈用先聖大師偈意偈曰
心地含種性 法雨即花生 頓悟花情已 菩提果自成
師說偈已令門人且散衆相謂曰大師多應不久住世間
師至先天二年八月三日食後報言汝等各着位坐共汝
相別時法海問言此法從上至今傳授幾代願和尚說師
64 下

曰初	六佛	釋迦第七	迦葉
阿難	末田地	商那和修	優波鞠多
提多迦	佛陁難提	佛陁蜜多	脇比丘
富那奢	馬鳴大士	毗羅尊者	龍樹大士
迦那提多	羅睺羅多	僧伽那提	僧迦耶舍
鳩摩羅駄	闍夜多	波修槃頭	摩拏羅
鶴勒那	師子比丘	婆舍斯多	優般堀多

婆須蜜多	僧迦羅叉	菩提達磨	北齊惠可
隋朝僧璨	唐朝道信	弘忍	惠能

師曰衆人今當受法汝等於後遞相傳付須有稟承依約
莫失宗旨法海曰言和尚留何教法令後代迷人得見自
性師言汝等聽之後代迷人若識衆生即見佛性若不識
衆生萬劫覓佛難逢吾今教汝識自心衆生見自心佛性
吾與汝說後代之人欲求見佛但識衆生只為衆生迷佛

非是佛迷衆生自性若悟衆生是佛自性若迷佛是衆生
自性平等衆生是佛自心邪險佛是衆生汝等心若險曲
即佛在衆生中一念平直即是衆生成佛我心自有佛自
若無佛心何處求真佛汝等自心是佛更莫狐疑外無一
切物而能建立皆是本心生萬種法故經云心生種種法
生心滅種種法滅吾今留一偈與汝等別名自性真佛偈
後代迷人識此偈意自正本心自成佛道偈曰

65 上

真如性淨是真佛 邪見三毒是魔王 邪迷之時魔在舍
正見之時佛在堂 性中邪見三毒生 即是魔王來住舍
正見自除三毒心 魔變成佛真無假 法身報身及化身
三身本來是一身 若向性中能自見 即是成佛菩提因
本從化身生淨性 淨性常在化身中 性使化身行正道
當來圓滿真無窮 姪性本是淨性因 除姪即無淨性身
性中各自離五欲 見性剎那即是真 今生若悟頓法門

忽悟自性見世尊 汝若修行覓作佛 不知何處擬求真
若能心中自見真 有真即是成佛因 不見自性外覓佛
起心總是癡人 頓教法門今已留 救度世人須自修
報汝當來學道者 不作此見大悠悠

師說偈了報言今共汝別吾滅度後莫作世情悲泣兩淚
受人吊問身著孝服非吾弟子亦非正法但如吾在日一
時盡坐無動無靜無生無滅無去無來無是無非無住無

往無名無字恐汝心迷不會吾意吾今再囑汝令汝見性
吾滅度後依此修行如吾在日汝等違法縱吾在世終無
有益大師言訖夜至三更奄然遷化大師春秋七十有六
師遷化日寺內異香氛氤經于七日感地動林變白日無
光風雲失色羣鹿鳴叫至夜不絕先天二年八月三日夜
三更時於新州國恩寺圓寂餘在功德塔記具述及具王維碑銘
至十一月韶廣二州門人迎師神座回曹溪山塋忽於龕

65 下

內白光出現直上衝天三日始散韶州奏聞奉勅立碑供
養至元和十一年詔追謚曰大鑒禪師事具劉禹錫碑洎
乎法海上座無常以此壇經付囑志道志道付彼岸彼岸
付悟真悟真付圓會遞代相傳付囑一切萬法不離自性
中現也

六祖壇經卷下